

◎歷朝憲章類誌卷之十九

△官職誌

★銓舉考課之法

●銓選

李仁宗太寧五年擢賢良有文武才者分管軍民選文職官員職字者入國子監廣祐二年試天下有文學者充翰林院官陳太宗建中四年以簿格頭試吏員入格者充省院屬以行移公文式謂之簿頭。

天應政平五年選儒生中科者入侍議爲定例

聖宗紹隆四年以書算試吏員中者充內令史椽吏太醫太祝各司考諸本藝者除本職十年選用儒生能文充閣館省院

裕宗大治六年試士人以文藝充館閣試吏員以書寫充省院屬

睿宗隆慶元年試吏員充內令史椽吏

按李陳銓選之法格限不可復考大略應選補官其制未爲至密士之有文學者卽充館閣吏之精簿書者隨補椽司其年勞任子之法亦皆有之要之等級資格未必如後來選法之精也

黎太宗紹平四年考課書算中式者六百九十人補內外各衙門屬椽小註試法第一場寫古文第二場真草字第三場算法宰執不好儒術專以簿牒詞訟責成有司吏屬多曲事上官故內外官缺卽保除用

仁宗太和七年除監生爲各路轉運副使。監生除縣官自此始。十月充監生三十人爲各道屬吏。監生充屬吏自此始。

聖宗光順八年會試中場者充三舍生。又定會試中二三場者充各衙門吏。考試教職中格除經歷等職。復命吏部考近侍學士除各縣縣丞。各衙門吏除各府教職。

按衙門吏之職若爲卑猥。黎初以監生中場爲之視之非不關重中興以後儒吏分爲二途。勾檢簿書之事不復委之士類。操筆行文者始以吏事爲鄙賤而不復談之矣。然常思之道外無事事外無道。簿籍算數蓋亦莫非儒者之務。周禮魚烹書計諸役一皆用士爲之。黎初以儒補吏想亦古人遺意而不可以爲非也。又按吏員之設當初未常冗雜。某衙繁者不過十餘名。簡者僅二三名。故其仕途清而職事治。洪德舊例分補各衙門內任繁者每衙十名次繁八名。簡任五名。太簡一名。各府繁任每衙五名。次繁四名。簡任三名。太簡二名。各縣繁任每衙三名。太簡二名。其各處鎮守留守督鎮衙門吏數。清華山西京北海陽安廣等處鎮衙門吏各十二名。太原宣光興化等處六名。廣平鎮八名。惟乂安鎮三十名。山南鎮六十名。中興後永盛七年始增置各鎮衙門頭吏。近世諸司吏職設置繁雜。爲之者率皆奸刁巨滑之徒擾民妨政。其弊寔由於此。有國者省冗吏而重其任。此固爲治之要務也。

是年定制任邊遠者滿九年始得別任京縣。又勅旨各衙出身除名職並許所管從公察舉。各縣正官有缺如無科目許以中三場調除。

洪德八年定各衙門吏資格出身例。凡在內者有出身各衙門吏初充書吏幹事三年充達吏又幹事三年陞充典使。又幹事三年無過犯陞都吏。如在內無出身各衙門吏初充爲通吏。幹事六年陞事三年。

補題吏。其在外各衙門同。又定各府衙令史資格例。初充爲亞令史。幹事三年陞充本府衙辨令史。又幹事三年陞充有出身衙門都史。

九年。又定官員子孫除用例。凡公侯伯子男長孫文武二三品長子除授四五六七八九品散官。間有年少好學者選入崇文館。吏部旌除典義司訓。

十五年定三舍生除用令。逐年會試中三場。充上舍生。中二場者充中舍生。一場充下舍生。每舍一百名。至除用時。吏部及國子監官照缺保舉。選除上舍生三分。中舍生二分。下舍生一分。

十六年定銓選方面及監守客使令。勅旨曰。丞司憲察方面官責任既尊。事權亦重。銓選之際。宜得其人。如有缺員。參議用六品以上。有器識資望。任滿四考以上。憲察用科臺國子監六寺等衙門官。有廉明歷練四考。衆所推獎者。如例選除。又定除擬稅使補正等職令。凡各稅務使見缺。吏部取有出身各衙門吏經選不取者銓除。以便修寫諸簿。其驛丞補正等稅使。取得誠旗軍選不取者銓除。十七年勅旨各衙司儒指揮各員。吏部同本衛官公同閱選內外各衙門見任文職有會試中場身頗壯健者。銓除各衙門司宿直應務。

是年勅旨各衛司儒指揮宿直應務滿考以上。如有奉公幹事無過犯者。衛長官勘寔具本。吏部照缺改除文職。未滿考老舊不堪者。揀汰其猶可用者改除。

二十五年詔華文學生有年深經差幹或從征有功。如各衙門出身吏例。吏部銓除。

二十七年定銓授各職令。係憲司缺員。選內進士科并各衙門文武各衙司儒指揮有會試中場奉公幹事彊直不畏避。並無過犯者除憲副職。其監生儒生學生各衙門吏。按吏會試累中場年深

知務勤幹及有軍功者初授知州及縣丞同知州首領序班等職滿三年方許寔授六年無過犯知縣知州除員外郎縣丞同知州典簿序班除司務主事推官都官等職滿六考無過犯員外郎同知府陞爲知府又定銓補訓導令係各處儒學訓導缺員吏部具奏送國子監及保衛門官保選儒生并中場吏及儒生三十五以上有學行無過犯者送禮部考課四場合格者如例銓除

按洪德銓除之制大抵以年場爲限年者取其經鍊之久場者取其文學之優而選法所視又以年深爲重如參議憲察必以科寺歷四考者銓除知府知縣必以中場滿二考六考遞授限以歲月之遲第其閱歷之久而僥倖者不可以冒進於其間此固達法之善也至于各衛應務各衛屬吏亦皆以中場爲之則是庶司百職無非儒學者流此文治之所以爲盛也又諸當時銓補體格如三舍學生則國監官審舉各衙門吏則所管者察舉各衛儒指揮則衛長官勘舉然後吏部照閲以次選補九載一期隨年填缺此選法之大略云

憲宗景統元年勅旨繼今六科給事中監察御史缺員吏部擇內外由進士出身廉勤剛正有政績者擬銓職任一年之後六科給事中公同考覆所行事具奏議旨堪用者留任不堪任者改除別職六科給事中不公許都御史考覆所行事具奏議旨堪用者留任不堪用者改除別職御史臺考覈不公六科官具寔憲糾彈若吏部銓選非人科臺容蔽者一體治罪又定陞調令凡在外各衙門府縣州各衙首領有陞調者吏部移文該知衙門詳勘若果廉勤幹事任內公務無缺廢者方許陞調又定改調令如某員本貫家居與衙門接近者吏部宜改銓別任三年定儒吏除用令詔華文學生儒生按吏監生各衙門都吏已經選用吏部查寔遞年會試中場

多者先除。少者後除。若無中會試場。年深先除。淺者後除。不得如前閱選身才。一概混除。違者抵罪。五年定選府衛所司官例。五府都督都檢點參督指揮使都總兵使以上。如有缺員。吏部取旨施行。每衛所總知缺一員。例取管領二員。管領缺一員。例取武尉三員。選取外任指揮翰林公同都承憲三司選取備奏銓除。

襄翼帝端慶四年。吏部都給事楊德簡奏言。臣等奉查洪德七年間。勅旨國子監三舍生年三十以上。本官方得保選除用。八年間。勅旨崇文館秀林局儒生年未至三十。充未滿十五年。但以會試中場。往往僥倖求進。有所攬擾不便。伏乞計今儒生監生年已至三十以上。充已滿十五年以上。本官方得保選除用。如例敢有徇私保舉。年少年淺者。該科御史臺舉奏治罪。以懲人臣徇私妄保。及僥倖攬擾之弊。於是寧郡公黎廣度等奏請定例。國子監監生會試累遭中場十五年以上。年深場多者。方得充上舍生。引選銓除牧民首領。伴讀長史訓導等職。若累中場已滿十五年。未得充舍生。及一遭中場已滿十八年以上。亦許保選除牧民首領等職。若年深才幹無中場滿二十五年以上者。亦許保結考試除州縣貳職。其已經引選而未滿年限者。待滿年限方得除用。若皇后戚屬苗裔。并開國功臣子孫。充弘文館儒生。遵如前例。

按年限之法。始於漢魏。董生所謂積日累久爲差。崔亮所定停解日月爲斷。皆以年歲爲等第。有梨限年銓除之法。其原蓋出諸此。然是法之弊。世儒每以爲不善。而歷代銓選率皆循用。卒未有能革之者。誠以至公之道。固未易能。而越資破格者。不可爲常。要不若躡級循資之易。以爲準也。愚竊以爲後世用人。誠不可無銓選之法。而選法所定不得不憑歲月之差。至奇才異等者。固不

易見而中常之人苟非假以日月驗其操行則躁競心生僥倖風啓其弊有不可勝言者此年限之法雖失之拘泥而其杜躁進之門示勉勵之準所以歸於不可易也噫拔奇不經固非銓衡之可用新進喜事寧若老鍊之爲優豈謂限年之果爲不善哉

襄翼帝洪順三年定吏部銓選之令如引選每遭四十人吏部先咨移各衙門端供應銓除者姓名公同科臺引選具奏取旨銓除年深及場多者先銓除年少及場少者後銓除有軍功者遵如洪德賞功令銓除疾劣瘦弱者除雜流散官

中興初參酌舊例準定吏部大除九年一期正二實任各職滿期及缺任銓除凡銓期預曉應選者告單陳由付銓選司查憲呈堂仍考閱照例銓衡備啓并付查奉下封子方領回具奏本送通政司待轉送抄本送來許各職納担謝錢付銓考司寫全銓遞就府堂舉候待令奉頒其初受勸令在吏部奉行付各職照領銓衡通例凡中場貳職并雜流各等者部官照次銓除惟參議憲副職在朝堂保舉

神宗盛德二年吏部類銓除內外各職下朝臣議凡預士望三場合格及功臣子孫並得錄用有超濫未及格一切停罷

玄宗景治二年令禁妄求特許職爵自後有功望堪爲某職必有司公論朝堂保舉經稟啓旨准奉勅旨定方許祇受從前經許各職並以虛論又定教子孫登科陞次例是年值會試科承使阮致廣知府武嚮等六人以教子登科並許朝堂吏部保銓陞次叙用三年准定雜職久次與有功者除任例